

## Fas Pita

# Nægkiariien sə rani mə nəfe i nəkukuə

Nəkukuə i Pita rımərai. Pita in iərmama riti ia twelef nərmama me səvəi İesu. In rımərai nəkukuə i mərhi pen i revən ti nakalasia me səməme kamharə parei fwe profens riti səvəi Rom kani mə Esia Maenor. Pita rokeikei mə truvehi utə nətərigien səvənraha ti nəri nə mə nərmama me nepwın kamhometə irəha ti nahatətəien səvənraha. Pita rokeikei mə rerınraha tramrhi mə İesu rokeikei pik irəha, nənə muvehi nəmisəien ti nirəha. Irəha tuhəkurirə noien səvəi İesu. Irəha tuho iamınha irə ti nəri nə mə Kumwesən rımərfi irəha mə irəha nərmama me səvənhi nənə İesu remhə ti nirəha. Pita rini pen ti nirəha mə tuhaməkeikei mharə ia narəien sə ro ikinan. In rini pen mwi ti nirəha mə ia tıprənə i nərəhaien rasori, mətə tuhaməkeikei mhərer əknekın, mho nətərigien səvənraha rəpwəmwıs, mhəmri pen əknekın nətərigien səvənraha ia Kumwesən, nənə mheitenhi narımnari amasan me səməme tuhəpkuvehe kurirə.

<sup>1</sup> İou Pita, iou aposol riti səvəi İesu Kristo.

Iakamrai nəkukuə i rauvehe tukumiaha nərmama pwıspwıs me səməme hiamarə kirkiri ia profens me i Pontas, mine Kalesia, mine Kapatosia, mine Esia, mine Pitinia.

<sup>2</sup> Kimiaha i nərmama Kumwesən rımərfi kimiaha resi pen nətərigien səvənhi sə in

ruvəukurən raka fwe kupwən. In rīmərfi kīmiaha mə Nənimwīn səvənhi tro kīmiaha hiəuvehe mhəmher, mho nəkur ikinan me səvənhi, nənə, tihəuvehe mho nəkwai Iesu Kristo, tukəfwīəfwī kīmiaha ia nīten.

Nəfwakiiēn səiou mə Kumwesən trəriari pehe namasanien mīne nəmərīnuien rasori mwi m kīmiaha.

*Pwəh səgnəgīni Kumwesən ti nīmīruien vi*

<sup>3</sup> Pwəh səgnəgīni Kumwesən i in Kumwesən mīne Tata səvəi Iərīmānu səkitaha Iesu Kristo! Napiien səvənhi rasori tukutaha. In ro kitaha sətui mwi ia nīmīruien vi, nənə, mo kitaha səmri pen əknekīn nətəriɡien səkitaha irə. In ro iamīnha irə nəpīn ro Iesu Kristo rətui mwi ia nemhəien səvənhi.

<sup>4</sup> Kumwesən ro kitaha sətui mwi mə tsəuvehi nautə amasan me in truvei pen m nərmama me səvənhi. Nautə amasan me nəha ko həpkīmərīr mhə, mhəpkəmkemīk mhə, nənə nukuraanien səvənraha ko rīpkīwən mhə. Kīnəmri amasan nautə me nəha fwe ia neiai tukuvei pehe m kīmiaha.

<sup>5</sup> Kīmiaha nərmama səməme Kumwesən ro tukuahag kīmiaha ia nīskaiien səvənhi ti nəri nə mə hiamahatətə irə. In trətui amasan tukumiaha meste tihəuvehi nīmīruien vi sə kīnəpnəpenə raka irə tukətoni rier pehe ia nəpīn sampam.

<sup>6</sup> Ramasan mə rerīmīaha ragien ti narimnari me i. Mətə təkwtəkwwuni rosi narimnari me səpəmsəpə tuhəuvehe mho nəmisəien m kīmiaha ia nəpīn ouihi a.

<sup>7</sup> Narimnari me i kamhəuvehe trahatən pen mə kımiaha hiamahatətə pərhiən. Aean i kol, nəri auər a mə trıpkıwən mwi nəpın riti, mətə nərmama tuhaməkeikei mhəuvani ia napw ti nətə sasien mə in kol pərhiən uə rekəm. Ia noien nəha rəmwhen a mwi nahatətəien səkımiaha sə ramasan məpi raka kol, tukaməkeikei ko kımiaha həregi nəmisəien me ti nətə sasien mə hiamahatətə pərhiən uə rekəm. Nənə mə hiamahatətə pərhiən, nəpın tukətoni Iesu Kristo rier pehe irə, Kumwesən trəgnəgın kımiaha, muvehi utə nəghımiaha, nənə, muvei pehe nisaiien m kımiaha.

<sup>8</sup> Nəri auər a mə hiəpkətoni mhə Iesu Kristo, mətə hiokeikei in. Nənə nəri auər a hiəpkətoni mhə nəha təkwtəkwni, mətə hiaməni nıpərhiənien irə, nənə, mamhəgien. Nagienien nəha hiamregi rasori pik anan iərmama riti ko rıpkını mhə ia nəgkiariien.

<sup>9</sup> Rerımiaha raməgien iamınha irə ti nəri nə mə hiaməuvehi nəri i sə hiamahatətə irə, in i mə Kumwesən truvehimıru kımiaha.

<sup>10</sup> Profet kupwən me hamətui ia suatuk i Kumwesən truvehimıru nərmama irə, nənə mamhəres mə tukəfo irə. Ia nəgkiariien sə Kumwesən rıməuvei pen mınraha, irəha həni irapw mə Kumwesən trasitu ia kımiaha ia namasanien səvənhi.

<sup>11</sup> Nəpın Nənimwın səvəi Kristo sə ramarə ia nirəha rıməkupwən mını irapw nəmisəien me səməme Kristo trıregi ia nıpwran mıne nasoriien

---

**1:7:** Job 23:10, Prov 17:3, Aes 48:10, Sek 13:9, Mal 3:3, Jem 1:3

**1:8:** Jon 20:29, 2Kor 5:7    **1:9:** Rom 6:22    **1:10:** Mat 13:16-17

**1:11:** Sam 22, Aes 53, Luk 24:26-27

sə tukuvei pen min truvehe kurirə, profet me haməmwur mə tuhəukurən mə nəfe suatuk mine nəfe nəp̄in narimnari me nəha tuhəier pehe.

<sup>12</sup> Kumwesən rino pui pen m profet me nəha mə nəgkiariien me səməme irəha kamhəni həpkəgkiari mhə ia nəp̄in səvənraha mə trasitu ia nirəha, mətə haməgkiari ia nəp̄in səkimiaha trasitu ia kimiaha. Narimnari me i profet kupwən me həməni təkwtəkwuni hiəuvəregi raka r̄iməuku pen ia tərhui nər̄mama səməme hənəvisau nəgkiariien amasan səvəi Kristo m kimaha. Nəgkiariien səvənraha r̄iməuku pen ia Nən̄imw̄in İkinan sə Kumwesən rər̄hi pehe i. Narimnari me i nagelo me irəha mwi hokeikei mə tuhətoni mhəukurən.

*Kumwesən sə r̄inəkwein kimiaha in İəmə İkinan, in rəmher*

<sup>13</sup> Ro pen tihaməkeikei mho nətərigien səkimiaha rər̄er mwatuk t̄i noien wok, mho nətərigien səkimiaha pwəh rukurən amasan. Tihəmri pen əknek̄in nətərigien səkimiaha ia namasanien sə Kumwesən truvei pehe m kimiaha nəp̄in tukətoni İesu Kristo rier pehe.

<sup>14</sup> Tiho nəkwai Kumwesən rəmwhen ia nəkwər̄hakwər̄ha me səməme kamho nəkwai tata me. Fwe kupwən kimiaha hiəreirei nari, nənə mamho noien ərəha me səməme rer̄imiaha rokeikei pik. Mətə təkwtəkwuni tihəpwəh nəsenien ia nətərigien me nəha ravi raka mwi kimiaha.

<sup>15</sup> Kumwesən sə r̄inəkwein ia kimiaha in İəmə İkinan, in rəmher. Ro İam̄inhi irə kimiaha

mwi tihaməkeikei mho kímiaha nəkur ikinan me, mhəmher ia narimnari me pam səməme hiamo.

<sup>16</sup> Iakani iamĩnhi irə ti nəri nə mə Nəkukuə Ikinan rani mə, “Tihaməkeikei mho kímiaha nəkur ikinan me, mhəmher; ti nəri nə mə iou Iəmə ikinan iakəmher.”

<sup>17</sup> Kímiaha hiaməkwein Kumwesən mə “Tata.” Mətə in Kumwesən ramo rəmnəmwhen ia nərmama me pam. Trərpwĩn noien me səvənraha tresi pen atukwatukw nəfe irəha həno. Ro iamĩnhi irə mĩne, nəpĩn kímiaha hiamarə ihi ia təkure tĩprənə i, tihaməkeikei mhehekĩr in, mamho noien sə ramasan.

<sup>18</sup> Kímiaha hiəukurən mə kineivinari ia kímiaha hiəuvəier raka ia narəien ərəha nəha kaha kupwən me səkímiaha həməuvei pehe m kímiaha. Mətə kĩpkərəku raka mhə kímiaha ia nari riti sə truvehe mərəha məmwhen ia kol mĩne silva,

<sup>19</sup> rekəm. Mətə kınərəku raka kímiaha ia nite Kristo in nəri keikei ramasan pĩk. Kristo in rəmwhen ia kwəti sipsip sə ratukwatukw pam, nemhəien uə nərhəien riwən anan irə.

<sup>20</sup> Kumwesən ruvərfi raka in fwe tui nəpĩn tĩprənə ramiwən ihi, nənə təkwtəkwuni rĩpko mhə tui nəpĩn sampam ruvehe kətoni in rier pehe ma-situ ia kímiaha.

<sup>21</sup> Ia Kristo kímiaha hiaməni nĩpərhiendien ia Kumwesən sə rino in rətui mwĩ ia nemhəien səvənhi nənə muvei pen nasorien min. Ro iamĩnhi irə Iəmə sə hiamahatətə irə, mamhəmri pen əknekĩn nətəriɡien səkímiaha irə, in i

---

**1:16:** Lev 11:44-45, Mat 5:48    **1:17:** Mat 6:9, Rom 2:11, 2Tim 4:14, Rev 2:23    **1:18:** 1Kor 6:20    **1:19:** Wok Me 20:28, Hip 9:12-14, 1Tes 1:2    **1:20:** Wok Me 2:23, Efes 1:4    **1:21:** Jon 14:6, Rom 4:24, 5:1-2, Rom 10:9

Kumwesən.

<sup>22</sup> Kimiaha hiamesi pen nægkiariien sə ro nɪpərhiendien mamhokeikei pərhiien piəvtaha me. Ia noien nəha hiənəpərhi raka nimiruien me səkimiaha həmhər. Mətə kimiaha tihaməkeikei mhərɪpɪn mamhokeikei pərhiien kimiaha me ia rerimiahə pam.

<sup>23</sup> Kimiaha hiənətui mwi rəmwhen nəkwərhakwərha me, nənə, nimiruien vi sə hiənətui mwi irə rɪpkuku pen mhə ti tata riti sə tremhə, mətə ruku pen ti Tata riti sə trɪpkemhə mhə. Nægkiariien səvəi Kumwesən sə ramiru mamarə rerin rino kimiaha hiətui mwi.

<sup>24</sup> Iakani iamɪnhi irə ti nəri nə mə Nəkukuə Ikinan rani mə,

“Nərmama me pam həmhwhen ia nurhi,

nənə namasanien səvənraha rəmwhen ia tihi nurhi.

Nurhi nəha ramaukei, nənə tihin me kamhəsas,

<sup>25</sup> mətə Nægkiariien səvəi Iərɪmənu ramarə ia nuk nuk me.”

Nənə in i nægkiariien sə kinəvisau m kimiaha.

## 2

<sup>1</sup> Ro pen kimiaha tihaməkeikei mhəpwəh noien ərəha me pam. Tihəpwəh mwi neikuəien, mhəpwəh mwi noien nətərigien səkimiaha ro kəru. Tihəpwəh mwi nəmwəkien ia kimiaha me, mhəpwəh mwi niniien nikaremiaha me.

<sup>2</sup> Kimiaha tihaməkeikei mhəuvehe mhokeikei pɪk nægkiariien səvəi Kumwesən sə rəmher mhəmhwhen iəkunouihɪ əmtəmetə me i kamhasək

mə tuhesis. Nəgkiariien i tro kɪmiaha hiəuvehe mhəpwinari, nənə, Kumwesən ruvehimiru kɪmiaha.

<sup>3</sup> Nəkukuə Ikinan rani mə, “Kɪmiaha hiənani əghan namasanien səvəi Iərimənu mhətoni mə ramasan pɪk anan.”

*Kristo in kəruəterei mɪru*

<sup>4</sup> Həuvehe ti Kristo. In nəha kəruəterei mɪru nəha nərmama me həni mə rərəha, mhəpwəh, mətə ia nəmri Kumwesən in kəruəterei keikei anan sə in rimərfi.

<sup>5</sup> Kɪmiaha mwi hiəmwhən ia kəruəterei mɪru me kauvrhəkin nimwə ia nirəha, nimwə sə Nənimwɪn ramarə irə. Ia nimwə nəha, kɪmiaha hiəmwhən ia pris ikinan me kamhousi əpune nərimiru me mamhəuvei pen m Kumwesən. Mətə narimnari me səməme kɪmiaha hiaməuvei pen ripko mhə nɪpwrai nari mətə kwa nənimwɪn. Nənə Kumwesən raməkwein amasan ia narimnari me nəha hiaməuvei pen min ti nəri nə mə hiaməuvei pen ia nəghi Iesu Kristo.

<sup>6</sup> Rəmwhən ia Nəkukuə Ikinan rani mə, “Hətoni ro. Iakaməmri kəruəterei riti fwe Saeon,<sup>a</sup> in kəruəterei keikei anan sə iou iakimərfi, kəruəterei nəha tukostat kuvrhəkin nimwə irə, nənə iərmama sə trɪni nɪpərhiənien irə, in trɪpkauris mhə.”

<sup>7</sup> Ro iamɪnhi irə, kəruəterei nəha in nəri keikei tukumiaha nərmama səməme hiaməni nɪpərhiənien irə, mətə nərmama səməme həpkini

---

**2:3:** Sam 34:8    **2:4:** Mat 21:42, Aes 28:16    **2:5:** Efes 2:21-22, Eks 19:6, Aes 61:6, Rev 1:6, Rom 12:1    **2:6:** Rom 9:33, Efes 2:20  
<sup>a</sup> **2:6:** Seacon in Jerusalem    **2:7:** Mat 21:42

mhə nɪpərhiɛniɛn irə, kəruətɛrɛi nəhə rəmwhɛn  
 ia nəgkiariɛn i ia Nəkukuə Ikinan rani mə,  
 “Kəruətɛrɛi nəhə nəmə kamhəuvrhəkɪn nimwə  
 hənuə rərəhə, mhəpwəh,  
 təkwtəkɰuni nəhə ruvəuvehɛ mɪno  
 kəruətɛrɛi sə rəpi raka pam kəruətɛrɛi  
 mɛ, məkwətəmhirɪ əknekɪn pam nimwə.”

<sup>8</sup> Nənə Nəkukuə Ikinan rani mwɪ mə,  
 “In i kəruətɛrɛi riti sə nərmama tuhapəti irə,  
 mine kəpwɪɛr sə tro irəhə həmwɛi”

Irəhə kamhapəti irə tɪ nəri nə mə kamhərui  
 nəgkiariɛn səvəi Kumwɛsən mamhesi pɛn a nəfɛ  
 Kumwɛsən ruvəukurən raka fwe kupwən məmri  
 mə tuho.

<sup>9</sup> Mətə kimiaha nərmama ia kwənəkɰus i  
 Kumwɛsən rɪmərɸi kimiaha, kimiaha pris mɛ səvəi  
 kɪg, kimiaha nərmama ikinan mɛ ia kusen kuatia,  
 kimiaha nərmama mɛ səvəi Kumwɛsən əpa. Kɪno  
 kimiaha iamɪnha irə mə kimiaha hiəukurən nɪni  
 irəpwɪɛn narimnari amasan mɛ Kumwɛsən rɪno.  
 In rɪnəkɰɛɪn ia kimiaha mə tiharaka ia nəpitəviɛn  
 mhəuvehɛ ia nukuraaniɛn amasan səvənhi.

<sup>10</sup> Fwe kupwən, kimiaha nərmama auər a mɛ,  
 mətə təkwtəkɰuni kimiaha nərmama mɛ səvəi  
 Kumwɛsən. Fwe kupwən, kimiaha nərmama  
 napiɛn səvəi Kumwɛsən riwən tukumiaha, mətə  
 təkwtəkɰuni kimiaha nərmama napiɛn səvənhi  
 ramarə tukumiaha.

<sup>11</sup> Nərmama keikɛi mɛ, kimiaha hiəmwhɛn  
 iəpɰisɰis mɛ mine nərmama imwənraha riwən  
 ia tɪprənə i. Ro pɛn iakani pɛhɛ tukumiaha

---

**2:8:** Rom 9:33    **2:9:** Aes 9:2, Aes 40:20-21, 1Tes 2:5, Taet 2:14,  
 Wok Me 26:18, Efes 5:8    **2:10:** Rom 9:25    **2:11:** Sam 39:12, Kal  
 5:17,24, Jem 4:1



i mə tihəpwəh nəsenien noien ərəha me nəha nıpwramiaha rokeikei pik səməme kamharuagən ia nəpın me mə tuhouraha nimiruien səkimiaha.

<sup>12</sup> Təkwətəkwuni nərmama səməme həreirei lərimənu kamhəni ərəha kimiaha mə kimiaha nəkur ərəha me. Ro iamınhi irə narəien səkimiaha hiamarə irə ia nənimenraha traməkeikei matukwatukw, pwəh irəha hətoni noien amasan me səkimiaha, nənə mhəuvehi utə nəghi Kumwesən ia nəpın nəha in truvehe irə.

*Nərmama me səvəi İesu Kristo tihaməkeikei mhəsiai nərmama səməme kamhərimənu*

<sup>13</sup> Tı nəri nə mə kimiaha nərmama me səvəi lərimənu səkitaha, tihaməkeikei mhəsiai nərmama me pam səməme haməuvehi nasoriien mamhərimənu. Tihəsiai ia kig sə in rasori anan,

<sup>14</sup> mhəsiai mwi ia nəmə asori me səməme in ramərhi irapw irəha kamhərimənu ia nəghin. Nəmə asori me nəha, kig ramərhi irapw irəha mə tuho nəmisəien m nərmama səməme kamho noien ərəha, nənə mhəgnəgini səməme kamho noien amasan.

<sup>15</sup> Kimiaha tihaməkeikei mhəsiai nəmə asori me pam tı nəri nə mə Kumwesən rokeikei mə noien amasan me səkimiaha trəsisəg tərhui nərmama me i həreirei nari. Pwəh irəha həpwəh mwi niniien nəgkariien arməri me.

<sup>16</sup> Ramasan mə hiamarə mhəmwhen ia nərmama kineivinari ia nırəha, mətə tihəpwəh niniien mə, “Eh, kineivinari ia nırak. İakukurən noien nəfe noien ərəha iakokeikei.” Kimiaha tihaməkeikei mamharə mhəmwhen ia iotukwininari me səvəi Kumwesən.

**2:12:** Mat 5:16, Luk 19:44

**2:13:** Taet 3:1

**2:15:** 1Pit 3:16

**2:16:** Kal 5:13

17 Tihəsiai nərmama me pam. Tihokeikei piəvtaha me, nənə tihəhekir mhəsiai Kumwesən, nənə tihəsiai kig sə ramərimənu.

18 Kimiaha slef me, tihaməkeikei mho nəkwai nəmə asori me səkimiaha, nənə mhəuvei pen nisaiien minraha. Tiho iamihhi irə minraha pam, nəmə asori me səməme kamho riməru mamasan m kimiaha mine nəmə asori me səməme kamho noien skai me m kimiaha.

19 Rəfo hiamo a narimnari me səməme hatukwatukw mətə nəmə asori me səkimiaha kamho rərəha ia kimiaha? Trini minuə hiəukurau ia nəpin skai me nəha, mamhəti pen a m Kumwesən, Kumwesən trəkwein amasan ia kimiaha.

20 Trini minuə hiamo noien ərəha, kamo nəmisəien m kimiaha tukwe, hiamo nətərigien səkimiaha rəpwəmwis ti nuvehien nəmisəien nəha, noien nəha ko kəpwəh nəgnəginien kimiaha tukwe. Mətə mə kimiaha hiamo a noien amasan, nənə kamo nəmisəien m kimiaha tukwe, Kumwesən trəkwein amasan ia kimiaha trini minuə hio nətərigien səkimiaha rəpwəmwis ti nuvehien nəmisəien nəha.

21 Kumwesən rinəkwein ia kimiaha mə tihəuvehi nəmisəien, ti nəri nə mə Kristo in mwi riməuvehi nəmisəien tukumiaha. In riməkupwən mahatən noien atukwatukw nəha mə kimiaha tihesi pen a təmwheki nisun.

22 Nəkukuə Ikinan rani mə,  
 “In rīpkō mhə noien ərəha riti,  
 kīpkregi mhə neikuəien riti ia tərhun.”

<sup>23</sup> Nəpɪn nərmama həni nəgkiariien ərəha irə, mətə in rɪpkəski mhə irəha. Nəpɪn in rɪregi nəmisəien ia nɪpwran, mətə in rɪpkini mhə mə trərpwɪn tai nərəhaien. Mətə rɪnəmri pen narimnari me pam ia rəgi Kumwesən sə raməkiri atukwatukw nari.

<sup>24</sup> In rɪməuvehi noien ərəha me səkitaha ia nɪpwran ia nei kamarkuau i mə ia nɪkaren səvəi noien ərəha kitaha tsemhə nənə ia nɪmɪruien səkitaha tsamo noien atukwatukw. Nəmisəien me səvənhi rɪməregi ia nɪpwran rɪno kimiaha hiəuvehe mhəsanɪn.

<sup>25</sup> Fwe kupwən kimiaha hiəmwhen ia sipsip me səməme hənəruei, mətə təkwtəkwwuni kərari ia kimiaha hiəvərərɪg mhəuvəuvehe tɪ lərmama ramətui tɪ sipsip me, in i lərmama ramətui tɪ nɪmɪruien səkimiaha.

### 3

#### *Nɪpran mɪne nərman me səvənraha*

<sup>1</sup> Ia noien a mwɪ nəha, kimiaha nɪpran me tɪhaməkeikei mhəsiai nərman me səkimiaha. Nənə trɪni mɪnuə irəha nəpwɪn həpkini mhə nɪpərhiendien ia nəgkiariien səvəi Kumwesən, mətə noien a səkimiaha truvi irəha həuvehe mhahatətə. Noien səkimiaha rəmwhen məpi raka mə hiəgkiari mɪnraha.

<sup>2</sup> Nəpɪn irəha hətoni mə noien səkimaha rəmher, hiaməsiai irəha, nənə noien nəha truvi irəha həuvehe mahatətə.

<sup>3</sup> Rərəha mə hiamasan pen ia nɪpwramiaha iruə ia noien nəha sə hiamərəri nɪmwai

---

**2:23:** Aes 53:7, 1Tes 3:9      **2:24:** Hip 9:28, Rom 6:2,11, Aes 53:5

**2:25:** Aes 53:6, Esik 34:5-6, Mat 9:36, Jon 10:14      **3:1:** Taet 2:5

**3:3:** 1Tim 2:9

nukwənemiaha, mamhəuvei pen marəmarə me kīno ia kol mīne tīnari amasan me.

<sup>4</sup> Mətə tihamasan pen imwə ia rerīmiaha sə kīpkətoni mhə. Ramasan mə tihəuvehe mho nīpran səməme nətərigien səkīmiaha rəpou mafafa. Noien iamīnha irə ramasan anan ia nəmri Kumwesən mīpkiwən mhə.

<sup>5</sup> In i noien səvəi nīpran ikinan me fwe kupwən səməme hənəmri pen əknekīn nətərigien səvənraha ia Kumwesən. Irəha hənəməsiai nərman me səvənraha, nənə ia noien nəha hənāmamasan pen ia rerīnraha.

<sup>6</sup> Rəmwhen ia Sera, in rīno nəkwai Epraham, nənə maməkwein in mə iamə asori səvənhi. Nənə kīmiaha nīpwnəti Sera me trīni mīnuə hīamo noien amasan, mhəpkehekīr mhə nari riti sə ramo nehekīrien.

<sup>7</sup> Ia noien a mwi nəha, kīmiaha nərman me tihaməkeikei mharə kīmiaha nīkare rəgīmiaha me, mhəukurən mə irəha pran nīskaiien səvənraha rīpkiskai pīk mhə rəmwhen ia iərman. Kīmiaha tihaməkeikei mhəuvei pen nīsiaiien mīnraha, tī nəri nə mə kīmiaha mīnraha tihəuvehi pəri nəri amasan i nīmīruien rerīn. Tīho iamīnha irə pwəh nari riti trəpwəh nəsisəgien nəfwakīien me səkīmiaha

*Nəmisəien kamregi tī noien amasan*

<sup>8</sup> Nəgkīariien sampam. Kīmiaha pam tihaməkeikei mho nətərigien səkīmiaha ruvehe mo kuatia, tihapi kīmiaha me, mhokeikei kīmiaha me, mho rerīmiaha rīməru tukumiaha me, mhəuvehi irapw nətərigien səkīmiaha.

9 Trini minuə nərmama kamho rərəha ia kímiaha, mətə tihəpwəh nərpwinien tai nərəhainen. Trini minuə nərmama hai m kímiaha, mətə tihəpwəh nərpwinien. Mətə tihəkwein amasan a ia nirəha. Tiho iamīnhi irə ti nəri nə mə Kumwesən rinəkwein kímiaha mə tiho noien nəha, mə hiəuvehi namasanien səvənhi.

10 Nəkukuə Ikinan rani mə,

“Iərmama sə rokeikei nimiruien amasan,  
nənə mokeikei mə triregi ramasan ia nəpīn me  
pam,  
in traməkeikei məpwəh ninien mwi nəgkiariien  
ərəha me ia nəramīn,  
məpwəh mwi neikuəien ia tərhun.

11 In traməkeikei mirərig ia noien ərəha me  
səvənhi, nənə mo a narimnari amasan  
me.

In traməkeikei mətui suatuk səvəi  
nəmərīnuien, nənə mukurirə i.

12 In traməkeikei mo iamīnhi irə ti nəri nə mə  
lərimənu ramətoni amasan nərmama  
səməme hatukwatukw,  
nənə mamətərig amasan ia nəfwakiien  
səvənraha,

mətə in raməmwəki səməme kamho noien ərəha.”

13 Trini minuə hiəskai pik ti noien amasan me, sin  
trouraha kímiaha? Iərmama riti riwən!

14 Mətə trini minuə nəpīn me nəpwīn nərmama  
kamho kímiaha hiamregi rərəha ia nipwramiaha  
ti noien atukwatukw səkímiaha, mətə ia nətərigien  
səkímiaha, kímiaha tihəregi ramasan. Tihəpwəh  
nehekīrien ia nirəha, mhəpwəh nətərig pikien.

<sup>15</sup> Mətə ia rerimiahaha tihəsiyai Kristo mə in İərimənu səkimiahaha. Tihərer mwatuk ia nəpın me pam ti nıripwenien nəgkiariien səvəi nisəməme nəha nərmama səməme tuhəres ia kimiahaha mə rəfo hiaməmri pen əknekın nətərigien səkimiahaha ia İesu.

<sup>16</sup> Mətə tihəgkiari məru mınraha ia nisaiien, mhəpwəh noien nari riti sə tro hiəregi fwe ia rerimiahaha mə hiəno nəərəhaien. Tiho əpa noien amasan me ti nəri nə mə kimiahaha nərmama me səvəi Kristo. Trini mınuə hiamo iamınhi irə nərmama me i kəmhəni nıkəremiahaha mə noien səkimiahaha rərəha tuhauris ti nəgkiariien ərəha me səvənraha.

<sup>17</sup> Trini mınuə ia nətərigien səvəi Kumwesən mə hiaməuvehi nəmisəien ti noien amasan me səkimiahaha, ramasan pik anan mwı məpi raka mə hiaməuvehi nəmisəien ti noien ərəha me səkimiahaha.

<sup>18</sup> Ro iamınhi irə ti nəri nə mə Kristo rımamhə ti noien ərəha me. Rımamhə nəpın kuatia a rınəmwhen. Ko rıpkemhə mhə mwı ia nəpın riti. In iərmama atukwatukw anan, mətə rımamhə ti nərmama həpkatukwatukw mhə mə truvehi kimiahaha hiəuvən ti Kumwesən. Hənousi əpune in nənə nıpwran remhə, mətə Nənımwın ro in rətui mwı ia nemhəien səvənhi,

<sup>19</sup> nənə ia nıskaiien səvəi Nənımwın nəha in revən mını irapw nəgkiariien riti ti nənımwın me i ia kalapus,

<sup>20</sup> səməme hənəmərui nəkwai Kumwesən fwe kupwən anan nəpın Kumwesən ramo nətərigien səvənhi raməpwəmwıs mameitenhi ia nəpın

---

**3:16:** 1Tes 2:12

**3:17:** 1Tes 2:20

**3:18:** Rom 6:10, Efes 2:18

**3:20:** Jen 6-7

Noa rinauvrhakin nitətə. Nərmama eit a, irəha kamhəmak ia nəkwai nitətə, Kumwesən riməuvehimiru irəha ia nui.

<sup>21</sup> Nui nəha, in nə nənimwi paptas sə rauvehimiru kimiaha nəha təkwtəkwuni. Paptas i ripko mhə nipwran i mə rinaikuas raka nəmtigei ia nipwrai iərmama, mətə nipwran mə hiəres Kumwesən mə rerimiaha truvehe mamasan məmher. Paptas nəha rukurən nuvehimiruien kimiaha iaminha irə ti nəri nə mə Iesu Kristo rinətui mwi ia nemhəien səvənhi.

<sup>22</sup> Iesu nəha, in ruvavən raka fwe ia neiai, maməkure ia nikare Kumwesən mwatuk, nagelo me, mine nənimwin me səməme kamhəuvehi nasorien mine niskaiien kamhəsiai in, mamho nəkwān.

## 4

### *Narəien kamarə irə kamesi pen nəkwai Kumwesən*

<sup>1</sup> Nəpən Kristo ramarə ia tiprənə i, in riregi nəmisəien ia nipwran. Ro pen kimiaha mwi tihaməkeikei mhəuvehi nətərigien rəmwhen ia səvənhi mə tro kimiaha hiəskai, ti nəri nə mə nərmama səməme kamhəregi nəmisəien ia nipwranraha rəmwhen ia Kristo, irəha həpwəh mwi noien noien ərəha.

<sup>2</sup> Ro pen nəpən hiamarə ia tiprənə i, tihəpwəh nesi penien noien ərəha me səməme rerimiaha rokeikei, mətə tihesi pen suatuk səvəi noien nəkwai Kumwesən.

**3:21:** Hip 10:22

**3:22:** Mat 22:44, Efes 1:20-21

**4:1:** Rom 6:2,7

**4:2:** 1Jon 2:16

<sup>3</sup> Nəpɪn sə ruvəuvehe muvəukurau raka hiənarə irə rɪnəpwəmwis mɪnəmwhen. Ia nəpɪn nəha kɪmiaha hiənamo noien ərəha me səməme nərmama həreirei Kumwesən hokeikei pik. Hiaməiri əpnəpen kɪmiaha me, mamho noien ərəha me nɪpwrəmiaha rokeikei, mamhənimwi nənimwiien skai mamhakonə irə, mamhətui pik nərəhaien, mamho lafet ərəha me, nənə mamhəfwaki m nənimwi nari me noien i in noien ərəha anan.

<sup>4</sup> Ipwet mine nərmama me nəha həreirei Kumwesən nənimenraha ramier ti nəri nə mə kɪmiaha tihəpkaiu mhə mhəuvən kɪmiaha mɪnraha, mhəpko mhə noien ərəha me sə rasori pik anan. Nənə irəha kamhəni ərəha kɪmiaha tukwe.

<sup>5</sup> Mətə irəha tuhaməkeikei mhəni irəpw ti Kumwesən mə hənəfarə irə. In ramərer mwatuk mə trəkiri nərmama həuvəmhə mine səməme kamhəmɪru.

<sup>6</sup> Ro pen kɪnəvisau raka mwi nəgkiariien amasan səvəi Kristo m nərmama səməme həuvəmhə, mə nəri auər a haməuvehi nərpwɪnien ia nɪpwrənrəha mhemhə rəmwhen ia nərmama pam, mətə ia nənimwɪnrəha kamharə mamhesi pen nəkwai Kumwesən.

<sup>7</sup> Nəpɪn sə narimnari me pam tuhəiwən irə ruvəuvehe ipaka. Ro pen tihəpwəh nakonəien ia nənimwiien skai. Nətərigien səkɪmiaha traməkeikei məmak amasan mə hiəukurən nəfwakiien.

<sup>8</sup> Nəri sə tihəkupwən mho in i tihaməkeikei



mhokeikei kímiaha me ia rerímiaha pam ti nəri nə mə nokeikeien ramousəman noien ərəha me həpik hiəpkətoni mhə.

<sup>9</sup> Ramasan mə tihəsevər ia rukwənu me səkímiaha tukumiaha me, mhəpwəh nəgkiari əgkiari pikien tukwe.

<sup>10</sup> Kímiaha kuation kuation hiaməuvehi nari riti sə Kumwesən ríməuvei pehe m kímiaha ramo hiamskai ti noien wok səvənhi. Ro iamínhi irə tihaməkeikei mho rəmwhen ia iotukwininari sə ramətui amasan ti nautə səvəi iəmə asori səvənhi, nənə, mhəuvehi namasanien me i səpəmsəpə Kumwesən rínəriari pehe, mhasitu ia kímiaha me irə.

<sup>11</sup> Trini minuə kímiaha riti in iərmama səvəi nəvisauien, ramasan mə in trəvisau mīni irapw nəgkiariien səvəi Kumwesən. Trini minuə kímiaha riti in iərmama səvəi nasituien, ramasan mə in trasitu, mo ia nəsaninien sə Kumwesən rauvei pen min. Mə kímiaha hio iamínha irə, nərmama tuhətə narimnari me hiamo nənə mhəgnəgini Kumwesən ti Iesu Kristo. Pwəh nasoriien mine nərimənuien krauevən tukwe in ia nuk nuk me. Ouəh, pwəh ro iamínhi.

*Nəmisəien kamo m nərmama me səvəi Iesu Kristo*

<sup>12</sup> Nərmama keikei me. Rərəha mə hiamərkərinari ia nəmisəien i rəmwhen ia napw sə rauvehe tukumiaha nəha təkwtəkwuni mə tro mətə sas ia nahatətəien səkímiaha. Hiəukurən mə rīpko mhə kímiaha əpa hiamregi nəmisəien me iamínha irə.

---

4:9: Hip 13:2

4:10: Rom 12:6-8

4:11: 1Kor 10:31

4:12:

1Tes 1:6-7

13 Mətə ramasan mə rerimiahaha tragien ti nəri nə mə nəmisəien me i hiamregi həmwəhen a ia səməme Kristo rıməregi. Trini minuə hiamo iamınhi irə, nənə rerimiahaha tragien pik anan nəpın tukətoni in rier pehe ia nıskaiien səvənhi.

14 Trini minuə nərmama kamhəni ərəha kimiahaha ti nəghi Kristo, nənə, rerimiahaha tragien, ti nəri nə mə Nənimwın asori səvəi Kumwesən ramarə ia kimiahaha.

15 Mətə rərəha mə kimiahaha riti rousi əpune iərmama, uə rakres, uə rərui loa, uə rani neikuəien mamouraha nəghi iərmama irə. Trini minuə kimiahaha riti ro iamınhi irə, ratukwatukw a mə tuko nəmisəien min.

16 Mətə trini minuə kamo nəmisəien m kimiahaha riti ti nəri nə mə in iərmama riti səvəi Kristo, ramasan mə iərmama nəha trəpwəh naurisien, mətə pwəh in rini nəghi Kristo muvehi utə Kumwesən irə.

17 Iakani iamınhi irə ti nəri nə mə nəpın sə Kumwesən trəkiri noien me səvəi nərmama irə ruvəuvehe nəha təkwtəkwuni, nənə in trukupwən məkiri noien me səkitaha nərmama səməme samarə ia nəkwai nimwə səvənhi. Trini minuə rukupwən ia kitaha, nənə trəfo ia nərmama səməme kamhərui nəgkiariien amasan səvənhi? In trəkiri noien me səvənraha kurirə ikin, mo riskai mwi minraha məpi raka.

18 Nəkukuə Ikinan rani mə,  
 “Trini minuə rəknekin ti nərmama atukwatukw me mə tuhəuvehi nimiruien,

---

**4:13:** Wok Me 5:41, Rom 8:17, 2Tim 2:12, Jem 1:2      **4:14:** Sam 89:50-51, 1Tes 2:20      **4:16:** Wok Me 11:26, Fil 1:20      **4:17:** Jer 25:29, 2Tes 1:8      **4:18:** Luk 23:31

nənə rəfo ia nərmama səməme həkisaii mhə  
Kumwesən mamho noien ərəha, irəha  
tuhəfa mhəuvehi nimiruien?”

19 Ro iamihhi irə nərmama səməme kamhəregi  
nəmisəien, mətə ti nəri nə mə nətərigien səvəi  
Kumwesən, ramasan mə irəha tuhaməmwur  
pen ia noien amasan, nənə, mhəmri pen  
nimiruien səvənraha ia rəgi Kumwesən mə trətui  
amasan tukwe. Irəha həkurən nətigiteien irə.  
In Kumwesən rino neiai mine tīprənə mine  
narimnari me pam.

## 5

*Nəvəhagien revən ti elta me səvəi nəfwakiiən mine  
ntəmaruə me*

1 Nənə iakokeikei mə takəgkiari kwopti m  
kimiaha elta me səvəi nəfwakiiən. Iou elta  
riti səvəi nəfwakiiən iakəmwhen a ia kimiaha.  
Iakinətoni Kristo ia nənimek nəpən riregi  
nəmisəien me ia nīpwran. Narimnari asori me  
i rīpko mhə tui həier pehe iou mwi takətoni.

2 Kimiaha tihəməkeikei mhətui amasan ti  
nərmama me səvəi Kumwesən səməme in rīnəmri  
irəha ia rəgimīaha. Irəha həmwhen ia sipsip  
me səvənhi. Rərəha mə tihətui amasan ti nīrəha  
rerimīaha rəpwəh nəgienien, mətə tihətui amasan  
ti nīrəha rerimīaha rəgien rəmwhen Kumwesən  
rokeikei. Nənə rerimīaha trəpwəh nīrhīien mə  
tihəuvehi mane irə. Mətə tihətui amasan a ti nīrəha  
ti nəri nə mə rerimīaha raməgien mə tihəsitu.

3 Nənə rərəha mə tihəfiətə kimiaha me,  
mamhərimənu ia sipsip me i səməme Kumwesən

riṅəmri irəha ia rəgimiahā, mətə tiho noien sə ratukwatukw mamasan mə irəha həukurən nətoniien mhesi pen noien səkimiahā.

<sup>4</sup> Iəmə sə rasori anan ia nərmama səməme kamhətui ti sipsip me trier pehe, nənə nəp̄in nəha in trəgnəgini kimiahā muvei pehe nasoriien m kimiahā sə tripkiwən mhə.

<sup>5</sup> Ia noien a mwi nəha kimiahā ntəmaruə me tihaməkeikei mhəsiāi elta me səvəi nəfwakiiē. Kimiahā pam anan tihəuvehi irapw nətərigien səkimiahā reiwaiu mhasitu ia kimiahā me, ti nəri nə mə Nəkukuə Ikinan rani mə,

“Kumwesən rerin ripkagien mhə ti nərmama səməme kamhəfiətə ia nirəha, mətə raməriari pen namasanien səvənhi m nərmama səməme kamhəuvehi irapw irəha.”

<sup>6</sup> Ro pen kimiahā tihəuvehi irapw atukw kimiahā, mharə tegin rəgi Kumwesən əsanin, mə in truvehi utə kimiahā ia nəp̄in atukwatukw səvənhi.

<sup>7</sup> Nənə tihəuvehi pam katipə pəmpəm me səkimiahā mhəuvehe mhəmri pen m Kumwesən ti nəri nə mə nəp̄in me rerin ramrhi kimiahā.

<sup>8</sup> Hətui mhətui amasan ti nəri nə mə iəremhə asori Setan raməmwəki kimiahā. In rəmwhen ia laeon riti sə raməkri asori mamavən mamətui iərmama mə trəni. <sup>9</sup> Tihərer əknek̄in ia nahətətəien səkimiahā mhəpwəh nəseniien in, ti nəri nə mə hiəukurən mə ia kwopun me pam ia tiprənə i kamo nəmisəien m piəvtaha me ti nəghi Iesu rəmwhen a ia nəmisəien me i kamo m kimiahā.

---

**5:4:** Hip 13:20, 1Kor 9:25      **5:5:** Efes 5:21, Jem 4:6      **5:6:** Mat 23:12, Jem 4:10      **5:7:** Sam 55:22, Mat 6:25-30      **5:8:** 1Tes 5:6  
**5:9:** Efes 6:11-13, Jem 4:7

10 Kumwesən in nukune namasanien me pam. In rīnəkwein ia kīmīaha hiəuvehe mho kua-tia kīmīaha Kristo mə tiharə kīmīaha min ia nasoriien səvənhi sə trīpkīwən mhə. Kurirə ia nəmīsəien kwakwa nəha hiamregi, in tromasan kīmīaha, məmri əknekīn kīmīaha hiəuvehe mhəskai mhəpwəh nīkiukiuien.

11 Pwəh in rərimənu ia nuk nuk me. Ouəh, pwəh ro iamīnhi.

### *Nəgkiariien sampam*

12 Saelas i kīmrau min, iakamətoni mə in piəvtaha riti iakukurən nətigiteien irə, in rīnasitu ia nirak mirai pen nəgkiariien səiou ia nəkukuə i. Iakamərhi pehe nəkukuə i tukumīaha, mamərpwi əknekīn kīmīaha, mani irapw mə in i namasanien pərhiēn səvəi Kumwesən tihərer əknekīn irə.

13 Pran sə ramarə ia Papilon<sup>a</sup> Kumwesən rīmərfi kīmīaha min, in rani ramasan tukumīaha, nənə nərik Mak, in mwi rani ramasan tukumīaha.

14 Tihəni ramasan tukumīaha me, mhakei m kīmīaha me ia nakeiien sə rahatən nokeikei-ien. Pwəh nəmərīnuiēn tramarə tukumīaha pam nərmama me səvəi Kristo.

---

**5:10:** 1Tes 2:12, 1Tes 1:6      **5:13:** 2Tim 4:11      **a 5:13:** Ia vas 13 Pita rini nəgkiariien i mə, “Pran sə ramarə ia Papilon.” Ripko mhə Papilon taon asori nəha Oltestamen raməgkiari irə, mətə rosi Pita rani Papilon in taon nəha Rom. Pran sə ramarə fwe ikīn in nəha nakalasia me səvəi Iesu Kristo ia taon nəha.      **5:14:** 1Kor 16:20

**Nəkukuə Ikinan**  
**The New Testament in the Nafe (Kwamera) language**  
**of Southeast Tanna, TAFEA Province, Vanuatu**  
**Niutestamen long lanwis Nafe blong Vanuatu.**  
**Le Nouveau Testament dans la langue Nafe de**  
**Vanuatu.**

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

---

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416